

# RI CHOJMILAL

Ri roxlajuj ruxe' ri nimanic nubij quere': "Nikanimaj chi c'atzinel yojoc choj. . ." Ri Vuj richin ri Mormon nitzijon chirij jun molaj utzilej tak vinaki' ri janíla utz xquiben rusa-maj ri Dios y chuka' utz' xquiben quiquin ri ch'aka' chic vinaki'. Can choj vi quina'oj y quichajin chojilej tak quic'aslen. Y janíla xquicukuba' quic'u'x riq'uin ri Jesucristo c'a pa ruq'uisibel (tatz'eta' c'a ri Alma 27:27). Re vinaki' re' can e choj vi y man xquitz'uc ta tzij y man xe'elek' ta. Romari', ri ch'aka' chic vinaki' xquiya' quik'ij. Y ri Dios niquicot chuka' riq'uin ri quibanon. Yalan nic'atzin chi niketamaj achique ri chojmilal. C'o bey re', yojtakchi'ix el richin nikatz'uc ta tzij y yojelek'. Nic'atzin chi niketamaj achique modo nikach'ec ri itzel takchinic re'.

Tasiq'uij ruvech ri Alma 27:27.

¿Achique camí xtic'ulvachitej vi conojel ri vinaki' xtiquiben ta ri choj?

## RI CHOJMILAL JARI' JUN RUXE'EL RI COLOTAJIC

Ri tz'aket chojmilal jumul nic'atzin chire ri kacolotajic. Ri Mark E. Peterson ja rija' jun Apóstol richin ri Ajaf. Rija' xubij quere': "Ri chojmilal jari' jun ruxe'el ri colotajic chupan ri rajavaren ri Dios. . . .Jun vinek man nitiquir ta nicolotej vi man nikasex ta chuxe' ya'. Y que c'a chuka' re', man nitiquir ta nicolotej vi man choj ta."

Ri Dios can choj vi pa ruvi' ronojel (Alma 7:20). Nic'atzin chi roj oj choj pa ruvi' ronojel chuka', vi nikajo' yojoc junan riq'uin rija'. Ri Runimal ri Jared xuk'alajirisaj: Ja', Vajaf, yin vetaman chi rat at jun Dios richin kitzij y xa man yatiquir ta natz'uc tzij (tatz'eta' c'a ri Eter 3:12). Pero ri Satanás, rija' can man utz ta. Jac'a rija' ri tata'aj richin ri tz'ucuj tzij (2 Nefi 9:9). Ri Elder Peterson quere' xubij: "Ri

vinaki' ri yek'olon, y yetz'ucun tzij, y yesuk'un, rije' ye'oc ri rusamajela' ri Satanás."

¿Achique roma nikabij chi ri chojinic jun ruxe'el ri colotajic?

### ¿ACHIQUE CAMI JUN CHOJ VINEK?

Jun choj vinek nrajo' ri kitzij y ri ruchojmilal. Can choj vi ri ruch'abel y ri rubanobal. Man nutz'uc ta tzij. Man nelek' ta. Man nik'olon ta.

### MAN CHOJ TA RI TZ'UCUJ TZIJ

Tok nikatz'uc tzij, nikarayij nikasech quina'oj ri ch'aka' chic vinaki'. Ri Ajaf xuya' jun pixa' chique ri ralc'ualaxela' ri Israel: "Man tatz'uc tzij chirij ri avach'alal" (Exodo 20:16). Ri Jesús chuka' xubij re' tok rija' xc'oje' chuech re ruvach'ulef (tatz'eta' c'a ri Mateo 19:18). Vi nikatz'uc tzij chirij ri kach'alal, jari' jun nimalej etzelal. C'o q'uiy ruvech chi tz'ucuj tak tzij. Vi man kitzij ta ri nikabij, jari' jun tz'ucuj tzij. Vi ketaman ri kitzij y man nikabij ta, jare' jun tz'ucuj tzij chuka'. Vi nikasuk' ri quina'oj ri ch'aka' chic vinaki' riq'uin ri kabanobal, jare' jun tz'ucuj tzij chuka'. Tok nikanim ri quinojibal ri vinek richin niquinimaj ri man kitzij ta, can man oj choj ta. Ri Ajaf man utz ta nutz'et re tz'ucun tzij re' y roj oj ejkayon richin ri tz'ucun tzij ri nikaben. Ri Satanás nurayij chi roj nikanimaj ta ri tz'ucun tzij. Que-re' c'a nubij rija': Tabana' c'a jun ca'i' oxí' tz'ucun tzij. Jare' xa manek rubanon (tatz'eta' c'a ri 2 Nefi 28:8). Ri Satanás nunim ri kanojibal richin nikanimaj chi utz nika-tz'uc tzij. Jun choj vinek retaman ruvech ri rubanobal ri Satanás y xtubij ri kitzij, stape' man xtika' ta chiquivech ri ch'aka' chic.

### RI ELEK' MAN CHOJ TA

Tok ri Jesús xc'oje' chuech re ruvach'ulef, rija' xubij: "Man catelek'." (Mateo 19:18) Yojelek' tok nikamej chire jun chic vinek ri achique ri man kichin ta roj. Yojelek' vi nikamej el ri achique richin ri tinamit o richin jun tienda o jun chic vinek. Vi yojsamej roma jun chic vinek y nikamej ri achique richin rija', jare' jun elek' chuka'. Elek' vi nika-c'ul más chuech ri c'o chi nikac'ul.

### MAN CHOJ TA RI K'OLOJ

Roj yojk'olon tok man nikatoj ta chijun ri kac'as riq'uin jun chic vinek. Yojk'olon chuka' tok nikac'ul jun cosa ri niya'-

ox chike pero man ruc'amon ta chi nikac'ul. Ch'aka' samajela' niquik'ol ri cajaf roma man niquiben ta ronojel ri samaj ri niya'ox chique. Pero niquic'ul ronojel ri cajel. Ch'aka' chic achi'a' yequik'ol ri quisamajela' roma man niquitoj ta ronojel ri quisamaj. Ri Satanás nubij quere': Takasaj ruk'ij jun chic vinek roma ri nubij, y tabana' c'a jun tzakibel richin ri avach'alal (tatz'eta' c'a ri 2 Nefi 28:8). Man choj ta vi nikakasaj ruk'ij jun chic vinek. Yekak'ol ri ch'aka' chic vinek chuka' tok man utz ta ri kasamaj o man utz ta ri nikac'ayij.

Tac'utuj chique oxí' vinek achique modo xkojoc choj. Catzijon c'a chirij ri tz'ucuj tzij, ri elek', y ri k'olój.

### **MAN TIKABIJ CHI UTZ VI MAN OJ CHOJ TA**

Q'uiy vinaki' niquibij chi vi rije' man e choj ta, manek rubanon. Ch'aka' vinaki' niquitz'uc tzij richin queri' xtikanojjij ta chi e nima'k tak vinaki'. Ch'aka' chic vinaki' niquibij chi utz ye'elek' vacami roma xtiquitzolij ruq'uexel jun k'ij. Ch'aka' niquibij chi ri niquelek'aj más nic'atzin chique rije' que chuvech ri rajaf.


Ch'aka' vinaki' yek'olon chupan ri escuela richin queri' xtiquch'ec ri examen. Ch'aka' niquibij chi utz ri k'olój roma conojel ri vinaki' niquibanala'. Ronojel re' niquibij ri vinaki' roma nicajo' niquinimaj chi manek rubanon ri tz'ucuj tzij. Ri Ajaf man utz ta nutz'et ronojel ruvech tz'ucuj tzij. Ri Presidente Kimball xubij chi nikak'ol ki' vi nikabij chi utz nikatz'uc tzij. Ri Espíritu richin ri Ajaf nel el kiq'uín vi queri' nikaben y xkojoc más itzel.

¿Achique nikac'ulvachij chupan ri kac'aslen tok nikabij chi utz nikatz'uc tzij?

### **C'O MODO RICHIN YOJOC CHOJ PA RUVI' RONOJEL**

Nic'atzin chi nikanic'oj ri kac'aslen y nikac'ul ronojel ri kitzij vi nikajo' yojoc choj pa ruvi' ronojel. Stape' c'o jun ti nitz ri man choj ta chupan ri kac'aslen, nic'atzin chi nitzolin pe kac'u'x.

Vi roj oj choj, ri etzelal man nitiquir ta noc chupan ri kac'aslen. Jari' tok xtikaben chi utzil ronojel ri kasamaj y ronojel ri c'ulanen tzij ri kabanon can. Stape' nikasech kapuak o yekasech jun kach'alal o stape' yojcamisex el, c'a nic'atzin na chi nikaben ronojel ri choj. C'a c'ari', xkojtiquir xtikatz'et apon ri Ajaf y yekatzu' apon ri ch'aka' chic vinaki' y man xkojq'uix ta. Ri Presidente Joseph F. Smith



yojrupixabaj quere': Tubana' c'a ri ruc'aslen ronojel vinek richin chi c'o modo ninic'ox ri runa'oj, y nitz'et achi'el jun vuj jakel, richin queri' manek ri nikaq'uixaj el.

¿Achique cami ri jumul chojmilal? ¿Achique xtikaben richin yojoc choj pa ruvi' ronojel?

CH'AKA' CHIC MOCAJ RI UTZ YE'ANIC'OJ

DyC 50:17 (cach'abalin xaxe riq'uin ri espíritu richin ri kitzij)

DyC 76:103-106 (ri achique xtiquic'ulvachij ri e tz'ucuyon tak tzij)

DyC 42:27 (yojrupixabaj chi man ta nikatz'uc tzij chirij ri kach'alal)

Exodo 20:15-16 (yojrupixabaj chi man ta yojelek' y man ta nikatz'uc tzij chirij ri kach'alal)

DyC 42:20, 84-85; DyC 59:6 (ri elek' ch'a'oj rij)

DyC 3:2 (Ri Dios choj)

DyC 10:25-28 (ri Satanás nutz'uc tzij)

RI BIX RI UTZ YE'ABIXAJ

"¿Achique ri Kitzij?"

"Tabana' ri Utz"



# RI LAJUJITAKIL (DIEZMO) Y RI CH'AKA' CHIC SUJUBEL

Ri Chicajel Katata' retaman ronojel achique ri nic'atzin chike. Rija' ruya'on can chike re pixa' re': "Ticanoj c'a nabey ri rajavaren ri Dios y ruchojmilal, y ronojel jere' xqueya' ruvi' chive" (Mateo 6:33).

Ri pixa' e ya'on pe chike chikato'ic richin nikachojmirisaj ki' richin xkojtiquir xkojc'oje' acuchi c'o vi ri Chicajel Kata-ta'. Ri Ajaf ruya'on jun rubeyal chike richin nikamatioxij chire coma ri katurusanic. Rija' ruya'on chike chi nikamatioxij chire riq'uin ri lajujutakil y ri sujubel. Tok nikatoj re', nikac'ut chuvech ri Ajaf chi nikajo' rija' y xtikanimaj rutzij. Quere' c'a xubij ri Ajaf: Jare' jun k'ij richin sujunic y jun k'ij richin niquiya' ri lajujitakil ri nuvinak (tatz'eta' c'a ri DyC 64:23).

¿Achique modo xtikamatioxij chire ri Chicajel Katata' coma conojel ri turusanic ri e ruya'on chike?

## RI RUTAKEXIC RI PIXA' RICHIN RI LAJUJITAKIL

Ojer can ri Abraham y ri Jacob xquitakej ri pixa' richin ri lajujitakil. Xquitoj ri lajujitak richin ronojel ri quich'acoj (tatz'eta' c'a ri Hebreos 7:1-10 y ri Génesis 28:20-22).

Chupan re k'ij re', ri José Smith quere' xubij chire ri Ajaf: Lok'olej Ajaf, tac'utu' c'a chiquivech ri asamajela' janipe' navajo' chi ri avinak niquitoj riq'uin ri lajujitakil (tatz'eta' c'a ri rutiquiribel ri DyC 119). Ri Ajaf quere' c'a xubij chire ri José Smith: Ja c'are' ri rutiquiribel ri lajujitakil. C'a c'ari', ri e tojoyon quere' xtiquitoj ri lajujitak ramaj che ronojel ri quich'acoj c'a chi juna'. Y jare' jun pixa' ya'on chique rije' jantape' (tatz'eta' c'a ri DyC 119:3-4).

Ri lajujitakil jare' ri lajujitak ramaj ri kach'acoj. Vi nikach'er pa lajuj ramaj ri kach'acoj, jac'a ri nabey ramaj, jari' ri

kalajujitakil. Re' c'o chi nikatoj tok manjani tikatoj ri kavay, y ri katziak y ri kachoch y ri ch'aka' chic achique ri nic'atzin chike. Vi ri kach'acoj jari' chicopi' o tico'n, nikaya' pe jun ri lajuj chicopi' o ri tico'n ri' (tatz'eta' c'a ri Levítico 27:30-32).

Tok nikatoj ri lajuj itakil, nikac'ut chuvech ri Ajaf chi cukul kac'u'x riq'uin. Chuka' yekatijoj ri ac'uala' che re pixa' re'. Queri', rije' niquetamaj chi yalan c'atzinel re pixa' re'. Chuka' xticaajo' xtiquben achi'el ri nikaben roj y xtiqutoj ri lajuj itakil tok niquich'ec quipuak.

¿Achique camí jun tz'aket lajuj itakil?

¿Achique xtikaben richin yekatijoj ri kalc'ual che ri lajuj itakil?

### **NIC'ATZIN CHI YOJYA'ON RIQ'UIN JUN UTZILEJ RAYIBEL**

Nic'atzin chi yojya'on riq'uin jun utzilej rayibel. Ri Stephen L. Richards quere' xubij: "Tok jun vinek nutoj ri lajuj itakil y xa manek quicoten pa ránima, rija' man xtuc'ul ta ronojel ri turusanic. C'o chi nretamaj nuya' riq'uin quicoten y riq'uin jun utzilej rayibel. C'a c'ari', xtiturusex."

Ri Apóstol Pablo xubij chi man xaxe ta nic'atzin ri achique nikaya', xa chuka' nic'atzin ri achique nikanojij pa kánima tok nikaya'. Quere' c'a xubij: ". . . tuya' achi'el ri nunojij pa ránima, man riq'uin bis o roma xa nic'atzin. Roma ri Dios nrajo' ri niya'on riq'uin quicoten" (2 Corintios 9:6-7).

Tasiq'uij ruvech ri 2 Corintios 9:6-7.

¿Achique roma c'o jantek roj nikaya' riq'uin bis o xaxe roma nic'atzin?

Tatzijoj quiq'uin ri vinaki' achique roma nic'atzin chi utz ri kanojibal tok yojya'on.

### **CH'AKA' CHIC SUJUBEL**

Roj ri oj c'o chupan ri K'ataj, yekaya' ch'aka' chic sujubel chire ri Ajaf. Nikaya' ri kapuak, y ri kasamaj, y ri c'o kiq'uin.

### **RI SUJUBEL RICHIN RI MEVAYINIC**

Ri puek richin ri sujubel richin ri mevayinic nicusex richin niya'ox vey, tziek, jay, y ak'om chique ri meba'i'. Tok utz nikatakej ri mevayinic jun bey pa jun ic', yojmevayin ca'i' va'in y manjun vey y ya' nikatij. Chuka' yojbe pa molojri'il richin ri mevayinic y man nikaq'ueq'uej ta richin nikaya' jun utzilej sujubel chire ri obispo richin yechajix ri meba'i'. Re utzilej sujubel re' jare' ri sujubel richin ri mevayinic.

## RI PUEK RI NIC'ATZIN CHE JUN TZOBAJ

Ri To'onel Xatat y ri Ruk'a' K'ataj y ri ch'aka' chic tzobaj chupan ri K'ataj c'o puek nic'atzin chique. Ri puek ri' nic'atzin richin nichajix ri capilla. Chuka' nic'atzin chubanic ch'aka' chic banobel chupan ri K'ataj. Nic'atzin chi nikatoj janipe' ri yojtiquir. Ri obispo o ri kach'alal ri c'o pa kavi' utz niquibij chike janipe' xtikatoj.

## RUPABAXIC JAY, RI UTZ VACHAJ, Y RI PUEK QUICHIN RI CH'ABALINELA'

Nic'atzin chi roj yojto'on chutojic ri quipabaxic ri capillas y ri lok'olej tak nimajay richin ri Ajaf. Riq'uin ri rubeyal ri utz vachaj ri nuben ri K'ataj (el Programa de Bienestar), c'o modo nikaya' ri kasamaj y ri c'o kiq'uin chiquito'ic ri meba'i'. Tok yojtiquir, nic'atzin nikaya' kasujubal riq'uin ri puek quichin ri ch'abalinela'. Riq'uin c'ari', nikato' ruch'abalinic ri utzilej rutzijol chuvehch re ruvach'ulef.

¿Achique roma nic'atzin chi nikato' ri K'ataj riq'uin ri kapuak?

## ¿ACHIQUE MODO YECUSEX RI LAJUJITAKIL Y RI CH'AKA' CHIC SUJUBEL?

Jalajoj ruvehch quicusaxic ri lajujitakil y ri sujubel chupan ri K'ataj.

1. Yecusex chuto'ic ri quisamaj ri ch'abalinela'.
2. Yecusex chiquipabaxic capillas y ch'aka' chic jay.
3. Yecusex richin yetijox ri ac'uala' chupan ri tijobel richin ri K'ataj.
4. Yecusex chiquitz'ibaxic ri vuj ri nic'atzin chupan ri K'ataj.
5. Yecusex chubanic ri samaj richin ri rucanoxic ri kijatzul y ri samaj chupan ri lok'olej nimajay richin ri Ajaf.
6. Yecusex chiquito'ic ri vinaki' ri man yetiquir ta niquikaxaj qui'.

¿Achique modo yatquito' ri lajujitakil y ri ch'aka' chic sujubel?

## YOJTURUSEX TOK NIKAYA' RI LAJUJITAKIL Y RI CH'AKA' CHIC SUJUBEL

Ri Ajaf rubin can chi xkojruturusaj vi nikatoj chi utzil ri lajujitakil y ri ch'aka' chic sujubel. Quere' c'a xubij: "Que'ic'ama' c'a pe ronojel ri lajujitakil chupan ri c'ujay, richin

queri' nic'oje' k'utun chupan ri vachoch. Y quinitojtobej c'a vacami, nicha' ri Ajaf quichin ri E Janíla. K'alaj c'a ri' vi man xtinjek ta pe ri ruchi' ri caj y xtinchoxoxej pe jun turusanic, c'a jampe' xtipulin'' (Malaquías 3:10).

Chupan ri DyC 64:23, nitzijox jun chic turusanic chique ri yetojon ri lajujitakil. Quere' nubij: Can kitzij vi chi jare' jun k'ij richin sujunic, y jun k'ij richin ri lajujitakil quichin ri nuvinak. Roma ri tojoyon ri lajujitakil man xtic'at ta pa ru-petebal.

Ri Ajaf rubin can chi xtuya' ri nic'atzin chike chuvach'ulef y chuka' ri turusanic richin ri ka espíritu. Vi yoja'on ri-q'uin utzilej rayibel, ri Tata'ixel xkojruto' chiquilic ri vey y ri tziek y ri jay ri nic'atzin chike k'ij k'ij. Ri Heber J. Grant xubij chi ri Dios xkojruto' richin yojnimer riq'uin jun etamabel chirij ri Dios, y riq'uin jun jiquibanic. Xkojruto' chuka' richin yojtiquir nikabanala' ri nubij ri utzilej rutzijol, y yekato' ri ka familia richin niqubiben queri' chuka'.

Ri yetojon ri lajujitakil y ri ch'aka' chic sujubel janíla yeturusex. Rije' quetaman pa cánima chi yeto'on chupabaxic ri rajavaren ri Dios chuvehc re ruvach'ulef.

Tatzijox oxí' turusanic ri nikil tok nikatakej ri pixa' richin ri lajujitakil.

CH'AKA' CHIC MOCAJ RI UTZ YE'ANIC'OJ

DyC 119:1-4 (ri pixa' richin ri lajujitakil)

Génesis 14:19-20; Alma 13:13-16 (ri Abraham xutoj ri lajujitakil)

2 Crónicas 31:5-6, 12; Nehemías 10:37-38 (ri ralc'ual ri Israel xquitoj ri lajujitakil)

3 Nefi 24:8-10 (¿la xtelek' el jun achin riq'uin ri Dios?)

# RI SAMAJ RICHIN RI CH'ABALINIC

Ja ri Ajaf ri xk'alajirisan ri rubeyal ri utzilej rutzijol chuvech ri Adán: Que c'ari' xchapatej ruch'abalixic ri Utzilej Rutzijol can pa rutiquiribel pe (tatz'eta' c'a ri Moisés 5:58). Xek'ax el ri juna' y ch'aka' chic achi'a' xe'oc itzel tak achi'a'. C'a c'ari', ri chojilej tak ruc'ajol ri Adán xetak el chuch'abalixic ri utzilej rutzijol: Rije'. . .xequipixabaj conojel ri vinaki' chupan ronojel ri c'o'jlibel chi titzolin pe quic'u'x. Y xetijox ri calc'ual ri achi'a' chire ri cukubabel c'u'x (tatz'eta' c'a ri Moisés 6:23):

Conojel ri profeta'i' e ch'abalinela' chuka'. Xbitej chique chiquijunal rije' chi tiquich'abalij c'a ri utzilej rutzijol chupan ri quic'aslen. Tok ri aj chicajel uchuk'a' c'o chuvech re ruvach'ulef, can nic'atzin vi chi e c'o ri ruch'abalinela' ri Ajaf. Rije' yequitijoj ri ralc'ual ri Dios chique ri tijonic ri man e q'uisel ta richin ri utzilej rutzijol.

¿Jampe' xutiquiriba' ruchabalixic ri utzilej rutzijol chique ri achi'a' chuvech re ruvach'ulef?

## RI RUK'ATAJ RI AJAF JARI' JUN K'ATAJ RI NUBEN RI SAMAJ RICHIN CH'ABALINIC

Ri ruk'ataj ri Ajaf jare' jantape' jun k'ataj ri nuben ri samaj richin ch'abalinic. Tok ri Colonel c'o chuvech re ruvach'ulef, rija' xerutek Apostoli' y Oxc'al Lajujlaxela'. Xuya' chique ri k'atbel tzij y ri samaj richin ruch'abalixic ri utzilej rutzijol. Janíla xech'abalin chique ri quivinak rije' quibini'an ri judíos (tatz'eta' c'a ri Mateo 10:5-6). Tok ri Jesús c'astajinek chic pe, xerutek ri Apostoli' chuch'abalixic ri utzilej rutzijol chique ri Gentili'. Quere' xubij chique ri Apostoli': "Quixbiyin chuvech ronojel ri ruvach'ulef. Titzijoj ri utzilej rutzijol chique conojel ri vinaki'." (Marcos 16:15).

Ri Apóstol Pablo xoc jun nimalej ch'abalinel. Rija' xtak quiq'uin ri Gentili'. Tok rija' oquinek chic chupan ri K'ataj, xuch'abalij ri utzilej rutzijol chique ri Gentili' chijun ruc'aslen. C'o bey re' ri vinaki' xquich'ey riq'uin xic'ay y xquic'akala' che abej y xquiya' pa che'. Man riq'uin vi ri', tok xosk'opix el coma ri xechapo', rija' xuchop chic ruch'abalixic ri utzilej rutzijol achi'el ri xuben can (tatz'eta' c'a ri Xquibanala' ri Apostoli' 23:10-12; y ri Xquibanala' ri Apostoli' 26).


Tok ri ruk'ataj ri Ajaf xcamulux pe chuvach'ulef roma ri Profeta José Smith, ri samaj richin ch'abalinic xchapitej jun bey chic. Vacami yatajinek ri quisamaj ri Apostoli' y ri Oxc'al Lajujlaxela' richin niquich'abalij ri utzilej rutzijol chuvech re ruvach'ulef. Rije' e c'o pa ruvi' ri samaj richin ch'abalinic. Ri Ajaf quere' xubij chire ri Profeta José Smith: Can tatzijoj ri utzilej nutzijol chuvech chijun re ruvach'ulef y chupan checonojel tinamit. . . Tak'alajirisaj ri avetaman pan avánima pa ronojel c'ojlibel, chiquivech checonojel vinek (tatz'eta' c'a ri DyC 66:5, 7). Chupan ri junio chupan ri juna' 1830, ri ruchak' ri José Smith, rubini'an Samuel Harrison Smith, xbiyin el chubanic ri samaj richin ch'abalinic roma ri K'ataj. Ja rija' ri nabey ch'abalinel richin ri K'ataj.

Jampe' na mil ch'abalinela' e oyon pe y e takon richin niquich'abalij ri utzilej rutzijol. Niquitzijoj chique conojel ri vinek chi ri Jesucristo ja rija' ri Ruc'ajol ri Dios y ri Colonel quichin conojel ri vinek. Niquijiquiba' chi ri utzilej rutzijol ya xyatej pe chic chuvach'ulef roma jun profeta richin ri Dios. Ri quisamaj ri ch'abalinela' richin niquich'abalij ri utzilej rutzijol chique conojel ri vinaki', y yequikasaj chuxe' ya', y yequitijoj chique ronojel ri pixa' ri ruya'on pe ri Ajaf (tatz'eta' c'a ri Mateo 28:19-20). Ri Chojlaxela' chupan ri Ruq'uisibel tak K'ij ri ye'oc ch'abalinela' yebe chuvech chijun re ruvach'ulef chutzijoxic ri utzilej rutzijol. Y rije' xa man e tojon ta.

¿Achique cami ri ca'i' tjonic ri yequitzijoj ri ch'abalinela'?

## **RI UTZILEJ RUTZIJOL XTITZIJOX NA CHIQUE CONOJEL RI VINAKI' CHUVACH'ULEF**

Bitajinek chike roma ri k'alajirisanic chupan re k'ij re' chi nic'atzin chi nikatzijoj ri utzilej rutzijol chique conojel ri





tinamit y conojel ri vinaki' chuvech chijun re ruvach'ulef (tatz'eta' c'a ri DyC 133:37). Ri Ajaf manjun bey nuya' jun pixa' chike vi man ta nutz'uc jun rubeyal richin yojtiquir nikaben ri pixa' ri' (tatz'eta' c'a ri 1 Nefi 3:7). Ri Ajaf xtuben jun rubeyal richin yojtiquir nikach'abalij ri utzilej rutzijol chique ri tinamit ri man yojruc'ul ta vacami. Ri Presidente Kimball ruc'utun chike chi tikac'utuj chire ri Dios chi ri tinamit ri' xquejakatej chuvech ri samaj richin ch'abalinic.

Ri Presidente Kimball xubij can chuka' chi xquetz'ucutej pe ch'aka' chic rubaniquil achojiq'uin xtibanatej vi ri samaj richin ch'abalinic. Xquetz'ucutej ch'aka' chic rubeyal richin chi ri kach'alal chupan ch'aka' chic tinamit xticac'axaj ri utzilej rutzijol pa quich'abel rije'. Roma can kitzij vi chi ri ch'abel c'o chi nel el vave' y nibe chuvech chijun re ruvach'ulef, y c'a chuchi' re ruvach'ulef. Nic'atzin c'a chi ri utzilej rutzijol nich'abalix chique checonojel ri vinaki' (tatz'eta' c'a ri DyC 58:64). Roj oj c'o riq'uin ronojel ri utzilej rutzijol. C'o c'a chi nikayala' chique ch'aka' chic vinaki'.

¿Achojche nic'atzin vi chi nrac'axaj ri utzilej rutzijol? Tac'utuj chique chiquijujunal chi tiquich'obo' rij jun vinek achojche xtuya' vi ri utzilej rutzijol?

### **CAN NIC'ATZIN VI RI SAMAJ RICHIN RI CH'ABALINIC**

Ri Ezra Taft Benson quere' xubij: Jare' ri nabey karayibal chupan ri k'ataj—richin yekacol y yekatzekkej ri calc'ual ri achi'a'. Nic'atzin ri samaj richin ch'abalinic roma jari' ri rubeyal richin chi ri vinaki' chuvach'ulef nicac'axaj ri utzilej rutzijol y niquinimaj. Nic'atzin chi rije' nicac'axaj ri kitzij y niquijel ri quic'aslen y nitzolin pe quic'u'x chupan ri quimac.

Janíla kach'alal vave' chuvech re ruvach'ulef e moyirinek roma ri tijonic niquiya' ri achi'a' ri man e kitzij ta. Rije' man niquil ta ri kitzij, roma xa man quetaman ta acuchi niquicanoj vi (tatz'eta' c'a ri DyC 123:12). C'o c'a modo nikaq'uen ri kitzij quiq'uin ri samaj richin ch'abalinic.

Quere' c'a rubin can ri Ajaf chike: Quixsamej c'a chupan ri vulef re' pa ruq'uisibel mul. Re ruq'uisibel mul que'ivoyoj c'a ri vinaki' chuvech re ruvach'ulef (tatz'eta' c'a ri DyC 43:28). Tok roj yekatijoj ri kach'alal chire ri utzilej rutzijol, jari' tok nikachojmirisaj apon ri rubeyal richin ri ruca'n rupetebal ri Ajaf (tatz'eta' c'a ri DyC 34:6).

¿Achique roma tok c'atzinel chi checonojel vinaki' nicac'axaj ri utzilej rutzijol y niquetamaj?

## **NIC'ATZIN CHI ROJ KONOJEL YOJOC CH'ABALINELA'**

Conojel ri vinaki' chupan ri K'ataj que'oc ch'abalinela'. Nic'atzin chi roj yojoc ch'abalinela', stape' man oj takon ta. C'o kasamaj richin nikac'ut ri utzilej rutzijol chiquivech conojel ri ralc'ual ri Chicajel Katata'. Nikac'ut chiquivech riq'uin ri kach'abel y riq'uin ri kabanobal. Ri Ajaf quere' rubin chike: Nic'atzin chi ronojel ri vinaki' ri yepixaban chic, niquipixabaj c'a ri cachibil (tatz'eta' c'a ri DyC 88:81). Ri profeta rubin chike chi tok c'a manjani quekapixabaj ri kachibil, nikac'ut chiquivech chi yekajo'. Nic'atzin chi niquic'ul ri kato'onic y ri kajovabal.

Ri caji' ruc'ajol ri Mosia yetzijox chupan ri Vuj richin ri Mormon. Riq'uin jun utzilej quirayibal, rije' xquiq'uen ka pa c'ánima ri samaj richin ch'abalinic. Tok e oquinek chic chupan ri K'ataj, rije' janíla xquijoyovaj quivech ri ch'aka' chic vinaki'. Xquirayij xquich'abalij ri utzilej rutzijol chique ri Lamani' roma man xquicoch' ta chi xtisach can nijun vinek. Tok xquinojij chi jun vinek c'o chi nic'ajisex ruvech roma ri rumac, can xebaybot vi y xec'arac'ot (tatz'eta' c'a ri Mosia 28:1-3). Que c'a chuka' re', tok ninoj ri kac'aslen riq'uin ri utzilej rutzijol, nikajoyovaj quivech ri kach'alal y can yekajo' vi. C'ari' xtkatzijoj ri utzilej rutzijol chique conojel ri ye'ajovan nicac'axaj.

¿Achique roma nikarayij nikaya' ri utzilej rutzijol chique ch'aka' chic vinaki' tok kaniman chic ri kitzij?

## **¿ACHIQUE MODO XKOJOC CH'ABALINELA' KONOJEL ROJ?**

Q'uiy rubeyal richin yojoc ch'abalinela':

1. Nikac'ut chiquivech ri kachibil chi janíla yojquicot roma nikaben ri nubij ri utzilej rutzijol. Riq'uin c'are', roj oj jun sakil chiquivech ri vinaki' chuvach'ulef.
2. Nikaya' can ri xibinri'il y yekato' ri ch'aka' chic vinaki'. Nikac'ut chiquivech chi nikarayij yekato' y man nikarayij ta yojch'acon chiquij.
3. Nikak'alajirisaj ri utzilej rutzijol chiquivech ri kachibil ri man e c'o ta chupan ri K'ataj.

4. Yekoyoj ri kachibil richin yepe chicac'axaxic ri ch'abalinela' chupan ri kachoch. Vi ri kachibil c'anej e c'o vi, nikac'utuj chique ri ch'abalinela' chi quepe chiquik'ejelaxic.

5. Yekatijoj ri kalc'ual chi can nic'atzin vi chi nikaya' ri utzilej rutzijol chique ri ch'aka' chic vinaki'. Y yekato' ri kalc'ual richin niquichojmirisaj apon qui' y niquinuc' ri qui-puak richin xque'oc ch'abalinela' chuka'.

6. Nikatoj ri lajujitakil y nikaya' juba' chupan ri puek quichin ri ch'abalinela'. Re puek re' nicusex richin ninimirisex ri samaj richin ch'abalinic.

7. Nikatek puek riq'uin jun ch'abalinel ri man can ta más nito'ox roma ri ru familia.

8. Nikacanoj ri retal ri kijatzul y nikaben ri quisamaj chupan ri lok'olej nimajay richin ri Ajaf, richin queri' xque'oc na chupan ri K'ataj.

9. Yekoyoj pe ri kachibil richin yojcachibilaj chupan ri kamoljri'il pa jay, y ri tak banobel pa capilla, y chupan ri nimalej tak moljri'il.

Ri Tata'ixel xkojruto' richin yojoc utzilej tak ch'abalinela' tok can nikarayij vi nikatzijola' ri utzilej rutzijol y nikac'utuj chire rija' chi kojruato'. Rija' xkojruto' c'a richin nikil jun rubeyal richin nikatzijoj ri utzilej rutzijol chique ri kachibil.

Tac'utuj chique chiquijujunal ri vinaki' chi tiquik'ijuj jun rubeyal richin niquitzijoj ri utzilej rutzijol chire ri vinek ri xucha' yan.

## **RI AJAF NUSUJ CHI XKOJRUTURUSAJ VI NIKABEN RI SAMAJ RICHIN CH'ABALINIC**

Ri Ajaf xubij chire ri José Smith chupan jun k'alajirisanic chi janíla yeturusex ri ch'abalinela'. Quere' c'a xubij ri Ajaf chique ri ch'abalinela' ri xquiq'uis yan ri quisamaj: Nim ruva ik'ij, roma chi ri jiquibanic ri ik'alajirisan rix tz'ibatajinek chila' chicaj richin queri' xtiquitz'et ri ángeles. Y rije' yequicot ivoma (tatz'eta' c'a ri DyC 62:3).

Ri Ajaf quere' rubin chike: Vi yixsamej chijun ri ic'aslen richin nitzijoj ri tzolibel c'u'x chique re vinaki' re', y niq'uen pe viq'uin xa jun oc vinek, can janíla vi nim xtuben ri iquicoten riq'uin rija' chupan ri rajavaren ri Nata'. Y chuka' vi nim ri iquicoten riq'uin ri jun vinek ri ic'amon pe viq'uin chupan ri rajavaren ri Nata', can nic'o ruvi' nim ri iquico-

ten vi ye'iq'uen ta pe q'uiy vinaki' viq'uin (tatz'eta' c'a ri DyC 18:15-16).

¿Achiq'ue roma tok janila nic'atzin chi nikajiquiba' chi can kitzij vi ri utzilej rutzijol?  
¿Achiq'ue modo yojturusex tok nikatzijol ri utzilej rutzijol?

CH'AKA' CHIC MOCAJ RI UTZ YE'ANIC'OJ

DyC 1:17-23 (nibix chire ri José Smith chi tich'aballn)

DyC 34:4-6; Ri Xquibanala' ri Apostoli' 5:42 (xtich'abalix na ri utzilej rutzijol)

DyC 60:1-2 (ri Ajaf yerupixabaj ri vinaki' ri niq'ixibij qui' niq'uitzijol ri utzilej rutzijol)

Mateo 24:14 (xtich'abalix ri utzilej rutzijol tok c'a manjani tipe ri ruq'uisibel)

Abraham 2:9 (xtiyatej ri aj ch'icajel uchuk'a' ch'ique checonojel ri tinamit)

JUN BIX RI UTZ NABIXAJ

"Xquibe Acuchi Xquinatek"